



▶▶▶ U okviru posjete BiH, turska privredna delegacija posjetila je Agenciju za unapređenje stranih investicija u BiH (FIPA) gdje se susrela sa direktorom Agencije Harisom Bašićem i njegovim saradnicima. Tursku delegaciju predstavljali su dr. Akkan Suver, generalni predsjednik Marmara Fondacije, dr. Hilmi Guler, zastupnik u turskom Parlamentu i bivši ministar energije i prirodnih resursa Republike Turske Orghan Erdem, zastupnik u turskom Parlamentu, Cengiz Damlasu, inženjer i predsjednik Upravnog vijeća Grupacije Cenay, Zihni Ganic, inženjer i član Upravnog vijeća Grupacije Cenay, Tugrul Solak, pomoćnik generalnog direktora Turk-Mogol, Meltem Colak, predstavnik Grupacije Nursoy i privrednik Aykut Eken.



▶▶▶ Mercator je otvaranjem trgovina manjeg formata na Bjelašnici i Igmanu obogatio ponudu olimpijskih planina na početku zimske sezone 2009./2010. Objekti se nalaze na Bjelašnici na samom skijalištu Babin dol i na Igmanu na Malom Polju. "Ovo je još jedan od

dokaza da Mercator ide u susret svojim kupcima, prati njihove potrebe i zahtjeve i svojim aktivnostima nastoji odgovoriti na njih. Vjerujemo da će svi koji ovu zimsku sezonu odluče provesti na olimpijskim planinama, u našim trgovinama naći adekvatnu ponudu", rekao je na otvaranju Haris Kuskunović, direktor Mercatora BiH.

▶▶▶ JP Direkcija cesta FBiH potpisala je osam ugovora za izradu projekata rehabilitacije 20 dionica magistralnih cesta. Ukupna vrijednost ugovora je 983.564,00 KM, a ukupna dužina ovih dvadeset dionica je 214 km. Potpisani su ugovori za izradu projekata sa sljedećim kompanijama: JV Aber, Restart, Pronasa & Igmtat (54.812 KM + 43.908 KM), Divel (175.090 KM + 168.058 KM), Trasa (100.956 KM), JV Zavod za saobraćaj GF Sarajevo i Design&QC (199.522 KM), CMT Projekt Sarajevo (99.625 KM), Integra Mostar (141.523 KM). Ovi ugovori finansiraju se iz kreditnih sredstava Evropske investicijske banke, a planirano je da se u 2010. godini po ovim projektima izvrše rehabilitacije magistralnih cesta u vrijednosti od 27 miliona KM.

▶▶▶ Direktor Agencije za razvoj malih i srednjih preduzeća RS Slobodan Marković i načelnik Opštine Zvornik Zoran Stevanović dogovorili su u Zvorniku detalje i aktivnosti o formiranju poslovne zone, koja će se nalaziti na prostoru bivšeg preduzeća Jadar, a kojeg je Vlada RS kupila u postupku stečaja. Uloga Agencije je da pomogne da se što efikasnije provede ovaj projekat, te da će u narednih 30 dana biti provedene neophodne aktivnosti da se poslovna zona formalno uspostavi kao subjekat.

▶▶▶ Narodna skupština Republike Srpske usvojila je po hitnom postupku izmjene i dopune Zakona o porezu na nepokretnosti kojim se produžava rok za podnošenje poreskih prijava za upis u fiskalni registar nepokretnosti sa 31. 12. 2009. godine do 31. 03. 2011. godine, koji će se početi primjenjivati od 2012. godine. Do sada je u Poresku upravu stiglo oko 480.000 prijava za upis u fiskalni registar, a procjenjuje se da je ukupan broj nepokretnosti 4.500.000.

▶▶▶ Poljoprivrednim proizvođačima u RS ukupno je isplaćeno 1.626.687 KM na ime premija za mlijeko za septembar, navodi se u saopćenju Ministarstva poljoprivrede, šumarstva i vodoprivrede RS. Prošle godine otkupljeno je 119 miliona litara mlijeka, a mjesečni prosjek iznosi od devet do 10 miliona litara. Na ime premija za proizvedeno i otkupljeno mlijeko u 2008. godini isplaćeno je 23.645.492 KM. Prosječan broj korisnika proizvođača bio je oko 15, kao što je i ove godine.